

■ OR DA LA VITA DA LUDMILLA CAHENZLI

La complexidad da las soccas

Easy, schessan mes uffants. Introducir
ina nova chasarina n'è insumma nagin
problem. Ins mussa ad ella, nua ch'il
tschitschapulvra è, co che la maschina da
lavar funcziuna e lura marschi puspè. Ma
hopla. La chaussa n'è tuttina betg uschè
simpla.

Jau, Ludmilla Cahenzli, sun adina
stada segira che mes perchasa saja il pli
simpel perchasa ch'i dat en Svizra:

Far ora cun il fier – be las chamischas
dad Eugen!

Ils tagliers vegnan direct en la maschi-
 na – nagut cun derschentar.

Tschitschapulvra vegn fatg uschè
pauc sco pussaivel.

Nettegiar palantschieus – sulet curt
avant che mes um Eugen tschiffa in'at-
tatga dal cor.

Sut talas circumstanzas èsi bain pipas d'introducir ina nova chasarina. Quai è fatg en diesch minutas.

Oz è la nova vegnida per l'emprima giada. Ed jau hai fatg persenn ch'in perchasa è ina vaira scienza. Schizunt tar ils Cahenzlis.

Il rument sa chatta en cuschina sut la
derschera, sco tar tuts. Ma il rest è unic,
p. ex. co dustar vestgadira. Quai fa min-
ta dunna auter. En mes perchasa existan
anc perfiditads spezialas. Pir cun mussar
a la nova chasarina hai jau badà ch'jau
met ensemen las chautschas suten sin
trais differentas modas: quellas dals uf-

fants faud jau ina giada. Quellas dals creschids, tut tenor sch'ellas èn per in mastgel u ina femella, trais giadas u insumma betg.

Tar las chautschas normalas va quai teater vinavant. Las chautschas d'uffants èi da faudar ina giada per lung. Quellas dals creschids duas giadas. Insatgi che legia quai po pensar: questa Ludmilla batta. Daco n'unifitgescha ella betg il sistem e metta ensemen tut tuttina.

Quai è gleiti ditg! Ma i na va betg. Sch'ins metess ensemen las chautschas dals uffants tuttina sco quellas dals creschids, vegniss la pluna memia auta e las chautschas n'avessan betg plaz en stgaffa. E las chautschas dals creschids na pon ins era betg metter ensemen auter, uschiglio na dumogn'ins betg ellas en la chaschutta.

Ina schliaziun fiss sa chapescha da cumprar novas cumodas u stgaffas. Lura pudess ins unifitgar e raziunalisar il sistem. I fiss ina simplificaziun e raziunalisaziun che duvrass l'emprim in'investiziun. Tuna sec bain! Ma Eugen fiss cunter l'investiziun. Pia: senza investizioni nagina raziunalisaziun.

Ma laschainsa questas banalas reglas
economicas e turnainsa tar mes perchasa.
Tut quai ch'jau hai ditg fin ussa davart
chautschas e chautschas suten è en sasez
anc sontg cumpareglià cun la complexi-
tad da las soccas da la famiglia Cahenzli.

Igl è pli simpel da declarar la varietad da plantas en la tschungla africana che da far cler ad insatgi il sistem da metter ensemen e dustar las soccas dals Cahenzlis. Fitg irritant è cunzunt ch'igl exista da tschertas spezias da soccas be in exemplar. Magari chatt'ins in segund exemplar cun in muster sumegliant, ma cun ina tut autra color. Jau suppon che singulas soccas fan atras ina metamorfosa en la maschina da lavar.

Gia mia chasarina veglia n'è mai vegnida da metter ensemend endretg nossas soccas – nundir da dustar ellas en il dretg lieu. Magari ha ella dustà las soccas da la pitschna en il truclet d'Eugen ed il cuntrari. Per part n'èn tals sbagls gnanca vegnids remartgads. I dat commembers da mia famiglia che van la damaun ord chassa cun soccas ch'èn diesch numers memia gronds u diesch numers memia pitschens. Senza ch'els faschessan persenn. Els èn era ventiraivels cun soccas bler memia pitschnas u bler memia grondas. Quai mussa atgnamain che l'entir hardumbel cun il perchasa n'è gnanc uschè impurtant. Also, Ludmilla, tge stas qua e fas quitads. Dà gas e va a lavurar! La nova chasarina vegn bain a vegnir a frida.

**Il cudesch pon ins retrair online tar Lia Rumantscha www.liarumantscha.ch
(http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria**

